

种福堂公选良方

（前附：温热论及续医案）

清·叶天士原著 华岫云编



出版者的话

中国医药学是一个伟大的宝库。为了继承发扬这份文化遗产，过去我社影印、排印出版了一批历代中医典籍。由于当时发行数量较少，以后又很少重印，许多书在社会上早已很难看到了。

随着我国卫生事业的发展，临床、教学、科研人员要求阅读历代医学原著的呼声越来越高。为了满足国内外广大读者的需要，遵照卫生部关于有计划地整理出版中医药古代书籍的指示精神，我社特选择历代有代表性的中医名著，进行校勘、句读，出版发行。

应该指出，历代中医古书中，有些现代科学尚不能解释的问题，或因受历史条件的限制夹杂了一些不当的内容，希望读者以辩证唯物主义的观点，正确对待，认真研究它的理论和经验，用科学方法进行整理和提高，发掘宝藏，吸取精华，推动中医这门科学的进一步发展。

人民卫生出版社

序

华与余家，世为姻娅。华君岫云精通岐黄术，常存利济救人之心，孜孜不倦。向慕吴门叶天士先生为当世卢扁，留心觅其医案，约计盈万，分门选刻，共成十卷，名曰临证指南，已遍行海宇矣。壬申岁，又将其续补医案、温热论与平生所集各种经验奇方付刊，以备救急，其愿甚诚。忽于癸秋谢世，其方止刻十之二三，半途而废，见者咸为惋惜。华君好友岳君廷璋不忍漠视，力劝徽苏义商程叶两君子授梓，完璧以公同志。一日汉川程君来蜀，出此编丐余作序。予素不知医，且当公务纷拿、军书旁午，竟不暇及。第展阅一过，了然心目，洵为青囊家不可缺一之书。即卢扁复起，亦不能舍是而别开窠奥。倘于乡陬僻壤，症患奇难，一时罕有良医调剂，备此查考，对症用药，立能起死回生，功效匪浅，慎勿以此编易简而忽诸。

乾隆四十年冬小春月赐进士出身钦命四川按察使司按察司加三级凝台杜玉林撰并书

总 目

卷一 温热论 续医案	1
温热论	1
续医案	8
卷二 公选良方	37
内外科	37
中风	37
补益	38
癆	39
盗汗	40
咳嗽	40
吐血	42
赤白浊	42
蛊	43
痞块	45
隔	47
便秘	49
风寒湿痹	50
针灸	54
黄疸	56
河白	56
中暑霍乱	56
消渴	57
瘟疫	58
痧	59
瘰癧	60

疔	63
泄泻	65
痢	65
脱肛	68
痔漏	69
肠风	73
溺血	75
卷三 公选良方	76
疝气	76
心口胃脘痛	77
呃逆	79
咳逆	79
耳	79
目	81
鼻	85
口	87
舌	88
牙	88
咽喉	89
痢疽	92
疔	93
广疮结毒	96
下疳	98
中毒	99
诸疮	102

诸丹毒	113
无名肿毒	114
卷四 公选良方	119
跌打损伤	119
围药	128
提药	131
降药	132
代针点头	134
长肉收口	135
麻药	136
痛癭	136
诸疯	138
瘰癧	140
汗斑	143
雀斑	143
疣痣	144

儿科	144
初生	144
雪口	145
脐风	145
稀痘	145
痧痘	146
惊痫	148
疳疮、疳积、诸疮丹毒 ..	150
妇科	157
经带崩漏	157
胎前	159
产后	160
乳疾	160
杂症	163
附录	164
急救诸方	164

卷一 温热论 续医案

温 热 论

温邪上受，（按：邪从口鼻而入，故曰上受。但春温，冬时伏寒，藏于少阴，遇春时温气而发，非必上受之邪也。则此所论温邪，乃是温风温湿之发于春末夏初者也。）首先犯肺，逆传心胞。肺主气属卫，心主血属营。辨营卫气血，虽与伤寒同；若论治法，则与伤寒大异。盖伤寒之邪，留恋在表，然后化热入里。温邪则热变最速，未传心胞，邪尚在肺。肺主气，其合皮毛，故云在表。在表，初用辛凉轻剂，挟风则加入薄荷牛蒡之属，挟湿加芦根滑石之流，或透湿于热外，或渗湿于热下，不与热相搏，势必孤矣。不尔，风挟温热而燥生，清窍必干。谓水主之气，不能上荣，两阳相劫也。湿与温合，蒸郁而蒙蔽于上，清窍为之壅塞，浊邪害清也。其病有类伤寒，其验之之法：伤寒多有变症，温热虽久，在一经不移，以此为辨。

前言辛凉散风，甘淡驱湿，若病仍不解，是渐欲入营也。营分受热，则血液受劫，心神不安，夜甚无寐，或斑点隐隐，即撤去气药。如从风热陷入者，用犀角竹叶之属。如从湿热陷入者，犀角花露之品，参入凉血清热方中。若加烦躁，大便不通，金汁亦可加入。老年或平素有寒者，以人中黄代之，急急透斑为要。若斑出热不解者，胃津亡也，主以甘寒，重则如玉女煎，轻则如梨皮蔗浆之类。或其人肾水素亏，虽未及下焦，先自徬徨矣。必验之于舌。如甘寒之中，加入咸寒，务在先安未受邪之地，恐其陷入易易耳。若其邪始终在气分

流连者，可冀其战汗透邪，法宜益胃，令水与汗并，热达腠开，邪从汗出。解后胃气空虚，当肤冷一昼夜，待气还自温暖如常矣。盖战汗而解，邪退正虚，阳从汗泄，故渐肤冷，未必即成脱症。此时宜令病者安舒静卧，以养阳气来复。旁人切勿惊惶，频频呼唤，扰其元神，使其烦躁。但诊其脉，若虚软和缓，虽倦卧不语，汗出肤冷，却非脱症。若脉急疾，躁扰不卧，肤冷汗出，便为气脱之症矣。更有邪盛正虚，不能一战而解，停一二日，再战汗而愈者，不可不知。再论气病有不传血分而邪留三焦，亦如伤寒中少阳病也。彼则和解表里之半，此则分消上下之势，随症变法，如近时杏朴苓等类，或如温胆汤之走泄。因其仍在气分，犹可望其战汗之门户，转疟之机括。大凡看法，卫之后方言气，营之后方言血，在卫汗之可也。（按：辛凉开肺，便是汗剂，非如伤寒之用麻桂辛温也。）到气才可清气。入营犹可透热转气，如犀角玄参羚羊等物。入血就恐耗血、动血，直须凉血、散血，如生地丹皮阿胶赤芍等物。否则，前后不循缓急之法，虑其动手便错，反至慌张矣。且吾吴湿邪害人最广，如面色白者，须要顾其阳气，湿胜则阳微也。法应清凉，然到十分之六七，即不可过于寒凉，恐成功反弃。何以故耶？湿热一去，阳亦衰微也。面色苍者，须要顾其津液。清凉到十分之六七，往往热减身寒者，不可就云虚寒而投补剂，恐炉烟虽熄，灰中有火也。须细察精详，方少少与之，慎不可直率而往也。又有酒客里湿素盛，外邪入里，里湿为合。在阳旺之躯，胃湿恒多；在阴盛之体，脾湿亦不少。然其化热则一。热病救阴则易，通阳最难。救阴不在血，而在津与汗；通阳不在温，而在利小便。然较之杂症，则有不同也。

再论三焦不得从外解，必致成里结。里结于何？在阳明

胃与肠也。亦须用下法，不可以气血之分，就不可下也。但伤寒热邪在里，劫烁津液，下之宜猛；此多湿邪内搏，下之宜轻。伤寒大便溏，为邪已尽，不可再下；湿温病大便溏，为邪未尽。必大便硬，慎不可再攻也，以屎燥为无湿矣。再人之体，脘在腹上，其地位处于中。按之痛，或自痛，或痞胀，当用苦泄，以其入腹近也。必验之于舌：或黄或浊，可与小陷胸汤或泻心汤，随症治之。或白不燥，或黄白相兼，或灰白不渴，慎不可乱投苦泄。其中有外邪未解里先结者，或邪郁未伸，或素属中冷者，虽有脘中痞痛，宜从开泄，宣通气滞，以达归于肺，如近俗之杏蔻橘桔等，是轻苦微辛，具流动之品可耳。

再前云舌黄或浊，须要有地之黄。若光滑者，乃无形湿热，中已虚象，大忌前法。其脐以上为大腹，或满或胀或痛，此必邪已入里矣，表症必无，或十之存一。亦要验之于舌：或黄甚，或如沉香色，或如灰黄色，或老黄色，或中有断纹，皆当下之，如小承气汤，用槟榔青皮枳实玄明粉生首乌等。若未现此等舌，不宜用此等法，恐其中有湿聚太阴为满，或寒湿错杂为痛，或气壅为胀，又当以别法治之。

再黄胎不甚厚而滑者，热未伤津，犹可清热透表。若虽薄而干者，邪虽去而津受伤也，苦重之药当禁，宜甘寒轻剂可也。

再论其热传营，舌色必绛。绛，深红色也。初传，绛色中兼黄白色，此气分之邪未尽也，泄卫透营，两和可也。纯绛鲜泽者，胞络受病也，宜犀角鲜生地连翘郁金石菖蒲等。延之数日，或平素心虚有痰，外热一陷，里络就闭，非菖蒲郁金等所能开，须用牛黄丸、至宝丹之类以开其闭，恐其昏厥为痉也。

再色绛而舌中心干者，乃心胃火燔，劫烁津液，即黄连石膏亦可加入。若烦渴烦热，舌心干四边色红，中心或黄或白者，此非血分也，乃上焦气热烁津，急用凉膈散，散其无形之热，再看其后转变可也。慎勿用血药，以滋腻难散。至舌绛望之若干，手扪之原有津液，此津亏湿热熏蒸，将成浊痰，蒙闭心胞也。

再有热传营血，其人素有瘀伤宿血在胸膈中，挟热而搏，其舌色必紫而暗，扪之湿，当加入散血之品，如琥珀丹参桃仁丹皮等。不尔，瘀血与热为伍，阻遏正气，遂变如狂、发狂之症。若紫而肿大者，乃酒毒冲心。若紫而干晦者，肾肝色泛也，难治。舌色绛而上有粘腻，似苔非苔者，中挟秽浊之气，急加芳香逐之。舌绛欲伸出口，而抵齿难骤伸者，痰阻舌根，有内风也。舌绛而光亮，胃阴亡也，急用甘凉濡润之品。若舌绛而干燥者，火邪劫营，凉血清火为要。舌绛而有碎点白黄者，当生疳也。大红点者，热毒乘心也，用黄连金汁。其有虽绛而不鲜，干枯而痿者，此肾阴涸，急以阿胶鸡子黄地黄天冬等救之，缓则恐涸极而无救也。其有舌独中心绛干者，此胃热，心营受灼也，当于清胃方中，加入清心之品。否则延及于尖，为津干火盛也。舌尖绛独干，此心火上炎，用导赤散泻其腑。

再舌胎白厚而干燥者，此胃燥气伤也，滋肾药中加甘草，令甘守津还之意。舌白而薄者，外感风寒也，当疏散之。若白干薄者，肺津伤也，如麦冬花露芦根汁等轻清之品，为上者上之也。若白苔绛底者，湿遏热伏也，当先泄湿透热，防其就干也，勿忧之，再从里透于外，则变润矣。初病舌就干，神不昏者，急养正，微加透邪之药；若神已昏，此内陷矣，不可救药。又不拘何色，舌上生芒刺者，皆是上焦热极也，

当用青布拭冷薄荷水揩之，即去者轻，旋即生者险矣。舌苔不燥，自觉闷极者，属脾湿盛也。或有伤痕血迹者，必问曾经搔挖否，不可以有血而便为枯症，仍从湿治可也。再有神情清爽，舌胀大不能出口者，此脾湿胃热，郁极化风，而毒延口也，用大黄磨入当用剂内，则舌胀自消矣。

再舌上白苔粘腻，吐出浊厚涎沫者，口必甜味也，为脾瘴病，乃湿热气聚，与谷气相搏，土有余也，盈满则上泛，当用醒头草芳香辛散以逐之，则退。若舌上苔如硷者，胃中宿滞，挟浊秽郁伏，当急急开泄；否则闭结中焦，不能从募原达出矣。

若舌无苔而有如烟煤隐隐者，不渴肢寒，知挟阴病。如口渴烦热，平时胃燥舌也，不可攻之，若燥者甘寒益胃，若润者甘温扶中，此何故？外露而里无也。

若舌黑而滑者，水来克火为阴症，当温之。若见短缩，此肾气竭也，为难治；欲救之，加入参五味子，勉希万一。舌黑而干者，津枯火炽，急急泻南补北。若燥而中心厚痞者，土燥水竭，急以咸苦下之。

舌淡红无色者，或干而色不荣者，当是胃津伤而气不化液也，当用炙甘草汤，不可用寒凉药。

若舌白如粉而滑，四边色紫绛者，温疫病初入募原，未归胃腑，急急透解，莫待传陷而入为险恶之病；且见此舌者，病必见凶，须要小心。凡斑疹初见，须用纸捻照看，胸背两胁，点大而在皮肤之上者为斑；或云头隐隐，或琐碎小粒者为疹。又宜见而不宜见多。按方书谓斑色红者属胃热，紫者热极，黑者胃烂；然亦必看外症所合，方可断之。然而春夏之间，湿病俱发，疹为甚。且其色要辨：如淡红色，四肢清，口不甚渴，脉不洪数，非虚斑即阴斑。或胸微见数点，面赤

足冷，或下利清谷，此阴盛格阳于上而见，当温之。若斑色紫，小点者，心包热也。点大而紫，胃中热也。黑斑而光亮者，热胜毒盛，虽属不治，若其人气血充者，或依法治之，尚可救；若黑而晦者，必死。若黑而隐隐，四旁赤色，火郁内伏，大用清凉透发，间有转红成可救者。若夹斑带疹，皆是邪之不一，各随其部而泄。然斑属血者恒多，疹属气者不少，斑疹皆是邪气外露之象，发出宜神情清爽，为外解里和之意；如斑疹出而昏者，正不胜邪，内陷为患，或胃津内竭之故。

再有一种白痞，小粒如水晶色者，此湿热伤肺，邪虽出而气液枯也，必得甘药补之。或未至久延，伤及气液，乃湿郁卫分，汗出不彻之故，当理气分之邪。或白如枯骨者多凶，为气液竭也。

再温热之病，看舌之后，亦须验齿。齿为肾之余，龈为胃之络，热邪不燥胃津，必耗肾液。且二经之血，皆走其地，病深动血，结瓣于上。阳血者色必紫，紫如干漆；阴血者色必黄，黄如酱瓣。阳血若见，安胃为主；阴血若见，救肾为要。然豆瓣色者多险，若症还不逆者，尚可治，否则难治矣。何以故耶？盖阴下竭阳上厥也。

齿若光燥如石者，胃热甚也，若无汗恶寒，卫偏胜也，辛凉泄胃透汗为要。若如枯骨色者，肾液枯也，为难治。若上半截润，水不上承，心火炎上也，急急清心救水，俟枯处转润为妥。若咬牙嚼齿者，湿热化风痉病。但咬牙者，胃热气走其络也。若咬牙而脉症皆衰者，胃虚无谷以荣，亦咬牙也。何以故耶？虚则喜实也。舌本不缩而硬，而牙关咬定难开者，此非风痰阻络，即欲作痉症，用酸物擦之即开，酸走筋，木来泄土故也。

若齿垢如灰糕样者，胃气无权，津亡，湿浊用事，多死。而初病齿缝流清血，痛者，胃火冲激也；不痛者，龙火内燔也。齿焦无垢者死；齿焦有垢者，肾热劫胃也，当微下之，或玉女煎清胃救肾可也。

再妇人病温，与男子同；但多胎前产后，以及经水适来适断。大凡胎前病，古人皆以四物加减用之，谓护胎为要，恐来害妊；如热极，用井底泥蓝布浸冷，覆盖腹上等，皆是保护之意；但亦要看其邪之可解处。用血赋之药不灵，又当审察，不可认板法。然须步步保护胎元，恐损正邪陷也。至于产后之法，按方书谓慎用苦寒药，恐伤其已亡之阴也；然亦要辨其邪，能从上中解者，稍从症用之，亦无妨也。不过勿犯下焦，且属虚体，当如虚怯人病邪而治，总之母犯实实虚虚之禁。况产后当血气沸腾之候，最多空窠，邪势必乘虚内陷，虚处受邪，为难治也。如经水适来适断，邪将陷血室。少阳伤寒言之详悉，不必多赘，但数动与正伤寒不同。仲景立小柴胡汤，提出所陷热邪，参枣扶胃气，以冲脉隶属阳明也，此与虚者为合治。若邪热陷入，与血相结者，当宗陶氏小柴胡汤去参枣，加生地桃仁查肉丹皮或犀角等。若本经血结自甚，必少腹满痛，轻者刺期门，重者小柴胡汤去甘药，加延胡归尾桃仁，挟寒加肉桂心，气滞者加香附陈皮枳壳等。然热陷血室之症，多有谵语如狂之象，防是阳明胃实，当辨之。血结者，身体必重，非若阳明之轻旋便捷者。何以故耶？阴主重浊，络脉被阻，侧旁气痹，连胸背皆拘束不遂，故去邪通络，正合其病。往往延久，上逆心包，胸中痛，即陶氏所谓血结胸也。王海藏出一桂枝红花汤加海蛤桃仁，原为表里上下一齐尽解之理。看此方大有巧手，故录出以备学者之用。

续 医 案

曹四六述去冬因恼怒时食厚味，遂致不饥，暖气脘痹，食物不下。视舌上布苔如粉，不渴饮，大便通调。议从太阴脾阳，为寒痰浊气凝遏，辛温定法。

厚朴 草果仁 姜汁 荜拨 生益智仁 广皮白

又 前因阳结浊聚，舌胎白厚，不渴饮，用芳香辛温得效。近日食物不慎，水谷气凝，清阳再窒为呕，舌胎犹未净，便下白腻如冻，腑阳亦衰。

公丁香柄 荜拨 茯苓 生益智仁 厚朴 生干姜

胡二六疾走作劳，身前胁腹闪气上下串痛。交正月，寒战气冲，呼吸皆阻，腹胀，脐上横梗，有形作痛，自痢已两月。思劳必伤阳，春令病加，是木旺侮土，中阳困急，浊气充塞，正气全伤，大肉尽削。述食入逾时，必加呕噫，后天生化之源大困，议急理中土之阳。

人参 茯苓 公丁香柄 川椒 乌梅肉 炒黄干姜

潘四二中年脉垂入尺泽，按之缓濡，腰椎痠痛，形体即欲伛偻，旬余大便必下血，此少壮不慎，肾真先夺，督脉不司固束，议用青囊斑龙丸。

高七一老年逆气右升，脘阻妨食，涎沫上涌，此属反胃。夫阳气结闭，为无形之伤，前药小效，未几反复，以老人生阳不至耳。

人参 生淡干姜 炒黑附子 猪胆汁

沈十七兀坐目注针黹，少阳气火上升，阳明气血因热拂逆，遂有结瘕瘰癧之累。前医不明解郁两和肝胃之治，致病日加增。今每日寒热，心躁若裂，经水较前已少，须虑热炽血干；且纳谷大减，难投重剂清寒。

生鳖甲 牡丹皮 川贝母 香附 谷芽 夏枯草花

杨二七食入即饥，心空易惊，经水或歇或至，病起产后，逾年不复，自述多食生冷。据理肝阴久损，不宜骤用温补。

人参 茯神 炙草 黄精 龙骨 金箔

顾腹痛，气上下行动即缓，从腑阳治。

人参 生谷芽 茯苓 煨姜 新会皮 砂仁壳

李三八哮喘久发，小溲频利，此肾虚气不收纳，痰饮从气而上。初病本属外邪，然数年混处，邪附脏腑之外廓，散逐焉得中病。宿哮不发时，用肾气丸三钱；哮喘坐不得卧，议用开太阳之里。

小青龙汤去麻辛

唐三五病是劳伤阳气，阳衰不主流行，清浊升降不得自如，是为虚痞之结。内经谓劳者温之，此温字乃温养之称，若吴萸大热开泄，乃是攻克，与劳伤原气相反。

苓桂术甘汤

贾二一痰血频发七八次，形寒妨食，无治痰嗽之理，急扶后天生气，望其知味进谷。

戊己汤

钱十八冲年阴精走泄，阳无依倚，血随气升，色紫成块，此血出于肝络，法当镇补。

人参 炒黑枣仁 炒白芍 炙草 青花龙骨 金箔

姚二一述四月患蛾喉痹，必系温热犯上，温不尽解，留邪化热，肺津劫烁，喉燥痒呛，防有气损热炽失血之累，甘寒润剂，不致伤胃。

绿豆壳 麦冬 生甘草 连翘 南花粉 金银花 蔗浆半杯

又浮热上炎，精走泄于下，致阴液阳精不肯上供。望

色萎瘦，纳食不旺，摄阴恐妨胃口。况初夏曾患喉症，大暑热泄，阴难生复。先议水陆二仙丹，摄固精关。

人参 秋石 芡实 金樱子膏丸

顾四三操持无有不动心神，心阳上引，相火交升，燔灼营液，舌为心苗，遂起痲瘰。病由情志不适，非汤药直清直降可治，议天王补心丹，制伏跷阳道路，营液得以升降自如；然必心境怡悦，方能却病。

天王补心丹

李四三长夏时令温热，内阻气分，宗内经湿淫于内，治以淡渗，佐以苦温。

飞滑石 川通草 淡竹叶 杏仁 厚朴

茹三五向来无病，因服地黄丸，反左胁腰中脐旁，气攻作痛，间有遗精，目暗虚花，或起浮翳，据述用细辛桂枝翳退，遂加头痛，此体质阳虚，误用阴寒臧浊所致。夫肝主疏泄，肾主藏固；肝宜凉，肾宜温；纳肾佐以通肝温下，仍佐肾阴，以制木火，是为复方。

当归 小茴 补骨脂 胡桃肉 茯苓 穿山甲 炒黄柏 青盐

林十八色苍形瘦，禀质阴虚火亢，津液不充，喜冷饮。夏季热蒸，须培生气、顺天时以调理。

麦冬 知母 川贝 地骨皮 丹皮 绿豆皮

项二八心热巅空，交寅卯带下，向来阴不足，少阳阳动，中虚食减，静养至秋凉，可望阴充。

人参 柏子仁 丹参 天冬 茯苓 建莲 龙骨 白薇

曹十四笑则痲厥病发，昼少夜多。思二月起病，春木正旺，内应厥阴肝脏木火，乃阳极之化，其来迅速，由内而升，神明遂乱，口吐涎沫，四肢寒冷，肝病何疑。由春病及长夏，

醒则如无，纳食如昔，法以纯苦直泄厥阴跷阳。

芦荟 青黛 龙胆草 川楝子 黑山栀 白芍 青皮
归尾 猪胆汁

又 前方用纯苦直清肝胆，初服即泻，病久阴分已虚，议理阴和阳，入酸以约束之。

生鸡子黄 阿胶 川连 黄柏 生白芍 米醋

徐二六胃减，痰血频发，上年误服玄参山栀，致使溏泻，此受苦滑寒凉之累。

人参建中汤

邹五三酒客食管窄隘，向有脘痛，今多食即反胃，气阻日久，必致瘀凝。食物宜淡薄，以上中二焦宣通气血治。

桃仁 蒲黄 降香末 苏梗 香附 橘红

程六三形瘦肌削，禀质偏热，夏秋病甚，是阴亏不耐暑热发泄之气耳。霜降收肃令行，浮阳潜伏，阴得自守，病觉稍退。述食辛辣热燥不安，其脏阴五液，为阳蒸变痰，非如痰饮可用阳药温通者。

人参 萸肉 川石斛 磁石 淡秋石 胡桃肉 女贞子
旱莲草

和 痰血，上午偏多，气分热炽。

金石斛 川贝母 桑叶 南花粉 大沙参 知母

单七岁为母丧悲泣，淹淹不食，面黄唇淡，情志不适，生阳郁窒。内经谓思为心疾，郁必伤脾，病属无形，非伤食恶食之比。稚年调理后天脾胃为要，佐以开益心气。

人参 茯苓 炙甘草 淮小麦 益智仁 石菖蒲

于 驰骑习武，百脉震动，动则络逆为痛，血沸出口。纳食起居，无异平日，非虚损也。凡气为血帅，气顺血自循经，不必因血用沉降重药。

枇杷叶 炒苏子 生苡仁 金石斛 炒桃仁 降香末

王四六望五年岁，真阳已衰。纳食逾二三日，反胃涌吐，仍有不化之形，痰涎浊水俱出，大便渐秘，此关格大症，阴枯阳结使然。

人参 半夏 茯苓 泡淡吴萸 生淡干姜 夜另服半硫丸一钱五分

蒋三五晨泻数年，跗肿足冷。长夏土旺初交，知饥痞闷妨食。述两三次半产不育，下焦气撒不固，任督交空。本病当以肝肾奇脉设法，今议先以胃药，以近日雨后暑湿乘隙侵犯耳。

人参 茯苓 益智仁 砂仁壳 炒扁豆 木瓜

又连年半产不育，痼泄，足跗浮肿。前用养胃和肝，非治本病，因暑湿伤而设。议固下焦之阴，益中宫之阳。

人参 禹粮石 紫石英 五味子 菟丝饼 砂仁 用蒸饼为丸

邢暴怒伤肝，白带下注，继而间血。人身冲任督带诸脉，皆丽身半已下。医用上中二焦疲药，焉能图幸。自言月事来而漏带息，初起必少腹腰痛，此内热是血络阴液损伤耳。性嗜酒，酒力先入肝胆，急当禁止。议固脉以摄下。

炒枸杞 炒黑当归 白薇 桑螵蛸壳 青花龙骨 生紫石英 煎药送震灵丹

陆二一腰冷，膝骨痠软，淋浊，溺后茎中空痛。少年未婚，此是勉强劳伤精关。且卧床必要垫实腰臀，虚象大著，交冬病加，间食少胃弱，非地黄腻滞、知柏泻阳可投。

菟丝子 复盆子 芡实 沙苑 家韭子 补骨脂 舶茴香 金樱子 线鱼胶丸

王二六过用心思，营气日漓，心悸眩晕，遗精，腰膝下部